

Masa depan cerah lepasan TVET

BAGI mencapai impian menjadi negara maju berpendapatan tinggi dengan acuan sendiri, negara memerlukan tenaga kerja tempatan yang berdaya saing dan berkualiti tinggi. Sudah semestinya kita tidak mahu lagi bergantung harap sepenuhnya kepada pekerja asing untuk memajukan negara kita. Justeru langkah pihak kerajaan untuk memperkisas dan menjenamakan semula sistem Pendidikan Teknikal dan Latihan Vokasional (TVET) adalah satu pendekatan yang amat wajar dan signifikan.

Hakikatnya kita perlu mengorak langkah ke hadapan untuk melihat hala tuju landskap dan pembangunan negara dalam pelbagai sektor sekurang-kurangnya untuk tempoh 20 atau 30 tahun yang akan datang. Kita sedar bukan mudah untuk mencapai dan mengekalkan status negara maju berpendapatan tinggi namun usaha dan langkah ke arah itu perlu dimulakan dari peringkat akar umbi lagi.

Dalam konteks ini inisiatif untuk melatih anak muda tempatan mahir dalam pelbagai bidang teknikal dan vokasional adalah sangat mustahak. Ini kerana kelompok anak muda inilah bakal memacu dan meneruskan kegemilangan negara ini pada masa akan datang. Dan kita juga perlu mengambil peluang dan membuat perancangan rapi supaya secara perlahan-lahan dapat mengurangkan pergantungan negara ini terhadap tenaga kerja asing yang terpaksa dibawa masuk bagi memenuhi keperluan pasaran kerja tempatan.

Baru-baru ini Perdana Menteri, Datuk Seri Najib Tun Razak mengumumkan lima lonjakan bagi mentransformasikan sistem TVET agar benar-benar berupaya menjadi agen perubahan dalam meningkatkan daya saing tenaga kerja tempatan serta ekonomi negara. Kita yakin langkah kerajaan ini dapat memastikan TVET menjadi pembekal tenaga kerja mahir negara sekali gus dapat menggantikan peranan pekerja asing.

Melalui lonjakan pertama, ke-

NOOR MOHAMAD SHAKIL HAMEED

Lulusan TVET bakal menjadi tulang belakang dalam mengemudi negara ini menjadi negara maju berpendapatan tinggi.”

rajaan akan melatih serta meningkatkan tenaga mahir tempatan secara berterusan daripada 28 peratus ketika ini kepada 35 peratus menjelang 2020 agar mereka menjadi kompetitif, berpeluang memiliki pekerjaan dan memperoleh pendapatan yang lumayan. Kerajaan juga merancang untuk melatih sehingga 300,000 rakyat Malaysia daripada golongan isi rumah berpendapatan rendah (B40) mulai sekarang hingga 2025.

Lonjakan kedua pula bakal membentuk sinergi dalam membangunkan tenaga kerja berkehadiran dengan cara memperkuuh dan memperhebatkan lagi kerjasama strategik awam-industri. Kerjasama strategik sebegini diyakini mampu menjadi platform terbaik kepada rakyat untuk dilatih menjadi tenaga kerja mahir dalam pelbagai bidang kritikal yang diperlukan oleh industri dan juga negara.

Selanjutnya untuk lonjakan ketiga, kerajaan akan memberi fokus supaya melahirkan lulusan TVET dalam bidang perniagaan dan teknousahawan agar mereka bukan sahaja mampu mewujudkan peluang pekerjaan tetapi menjadi ikon kepada tenaga kerja tempatan selain berkebolehan bersaing di pentas antarabangsa.

Bagi lonjakan keempat pula iaitu melaksanakan program geran padanan, kerajaan memperuntukkan RM20 juta dalam Bajet 2017 di mana peruntukan kewangan diberikan pada nilai yang



LIMA lonjakan diumumkan kerajaan baru-baru ini bagi mentransformasikan sistem TVET akan meningkatkan daya saing tenaga kerja tempatan dan ekonomi negara. - GAMBAR HIASAN/UTUSAN

setara dengan nilai sumbangan diterima daripada pihak industri melibatkan program-program TVET berimpak tinggi. Lonjakan kelima pula akan menjenamakan institusi TVET melalui TVET Malaysia yang mana menyaksikan kesemua institusi TVET di bawah pelbagai kementerian akan bersatu dan bergabung tenaga sebagai kerjasama unggul bagi melatih anak-anak mud menjadi tenaga kerja teknikal yang berkemahiran tinggi.

Penulis yakin kelima-lima lonjakan yang diumumkan ini hadir tepat pada masanya bagi melahirkan tenaga kerja tempatan yang diperlukan oleh industri dan negara bagi mengharungi fenomena Revolusi Industri 4.0 yang sedang hangat diperdebatkan di seluruh dunia.

Untuk itu, kita perlu memastikan pengisian dan pengolahan silibus pendidikan dan latihan yang diajar dalam setiap program

TVET sentiasa terkini dan memenuhi keperluan pasaran tempatan dan juga piawaian antarabangsa. Malah bidang-bidang latihan yang ditawarkan juga perlu disemak dan dijenamakan semula secara menyeluruh supaya terus kekal relevan di samping dapat menarik minat anak muda negara ini untuk menyertaiinya.

Dalam konteks ini kerjasama strategik awam-industri yang bakal dibina melalui lonjakan kedua sepatutnya menjadi nadi dan tulang belakang hala tuju sistem TVET di negara kita. Malah industri juga dapat dilibatkan secara aktif untuk melatih kelompok pelajar secara praktikal.

Kita juga berharap menerusi lima lonjakan itu mampu membantu mengubah imej bidang TVET serta persepsi masyarakat terhadap sistem TVET yang selama ini dilihat sebagai sistem pendidikan kelas kedua ataupun tempat latihan kepada pelajar-pelajar yang kurang menyerlah dalam bidang akademik.

Ringkasnya, kita perlu meyakinkan belia dan masyarakat betapa TVET mempunyai masa depan yang cerah. Lulusan TVET bakal menjadi tulang belakang dalam mengemudi negara ini menjadi negara maju berpendapatan tinggi.

Jadi, kita berharap kelima-lima lonjakan yang diumumkan oleh kerajaan ini dapat diperhalusi dan diperincikan secara serius sekali gus dilaksanakan mengikut tempoh masa yang ditetapkan. Semoga sistem TVET dapat terus memastikan daya saing tenaga kerja tempatan.

PENULIS ialah Timbalan Pendaftar Fakulti Kejuruteraan Universiti Putra Malaysia (UPM).